

四庫全書

集部

欽定四庫全書

集部

御製樂善堂全集定本卷十一
三

臣 永瑤 恭 校

侍讀臣孫球覆勘

覆校官中書臣田尹衡

校對官助教臣胡予襄

謄錄貢生臣李 樞

欽定四庫全書

御製樂善堂全集定本卷十一

賦

耕藉賦

并序

皇上御宇之五年青帝司方之二月春風普扇陽德方

亨

天子乃耕於千畝之田禮也臣聞聖王務本耕藉以勸

農功明主孝親親推以供祀事我

皇上孝以事

親勤以率民二載甲辰既耕加一茲又

躬行耕藉之禮急菑盛重民食致誠匪懈其典則隆洪

惟我

皇上道洽天人化霑草木誕敷文德廣運聖謨渥澤周

於羣生至治昭乎天壤乃猶頻興重農之典時

勤保介之咨追厥唐虞播種之踪為彼率土民

人之勸萬衆觀儀上農終畝追厥秋成登於天

廩薦之

皇天供於

祖考臣知

皇天

祖考鑒

皇上之精誠歆

皇上之大孝必錫嘏降祉永保無疆明德惟馨聿懷多

福臣不勝踴躍懼忭之至謹拜手稽首而獻賦

曰

繫惟重華之命稷兮播穀實繼乎禹功必烝民之粒食
兮始風動而時雍親耕肇於姬籍兮意往聖之皆同我
大君之首出兮屢三推以勸農豈玉食之是享兮惟簋
簠之虔供秉耒耜以率先兮符澤物之元功於是春陽
初布青帝司方嘉萬物之昭蘇值千卉之勾萌農祥既
見土脈方昌協風應律陽氣滋彰

皇帝乃順月令撫嘉辰念民力飭甸人當前期而致敬

用有事於青春於焉載師清畿封人淨路常伯獻儀掌
舍設栢爾乃青壇蔚其聳立華華森其崔巍雲移翠幕
柳拂青幃啟千畦之平壤欣四塗之腴肥逮夫元辰既
屆曉色方鮮

天子則御藻冕佩蒼瑱被龍袞鳴和鸞載青旂揚朱旃
接游車之鱗鱗施梁輶之戔戔爾乃稷宮將近樂具班
陳

天子乃降御輦饗農神祈嘉穀焚燎薪禮成而退有事

耜田衣被襪襪趾履陌阡王侯衛後虎賁導前太僕秉
轡牽牛奉鞭乃歷廣場撫御耜執縻手底不辭瘁乎三
推載耒御間試躬親乎千畝王公卿貳或五或九白叟
黃童歌呼奔走維誠敬之聿昭知樂愷之孔厚於是黛
紉方輟紺轅遂旋雨廉纖以灑潤風縹緲而淨天侍從
偕來睹

天顏之有喜馨香上達卜慶兆於豐年夫元鳳下親耕
之詔永平垂開耜之篇魏主望公田而發趾晉帝帥羣

后以祀先尚傳為古今之盛事並書之史冊而爛然況
乎我

皇至仁大知既事治而府修亦成天而平地修稼穡以
勤民謹神倉而藏事所無逸以知艱重明業而將祭三
春暖兮播百穀四野寧兮進雙穗也哉乃為之歌曰田
之興兮稷之功澤萬物兮助鴻濛我

皇展事兮千耦其同和協天人兮一哉

皇秉既耕既耨兮我稼其豐爰播爰植兮麻麥朦朦又

歌曰思樂旬畿千頃其耦

驚輅載臨

躬耕其畝登於秋廩斯箱斯倉薦之

宗廟供之明堂神之格思綏祉無疆

一人有慶永奠萬邦

四時勤政賦

惟聖人之建極兮法天運以自強歷四時以勤政兮亦
日就而月將堯兢兢而舜業業兮萃芳軌於我

皇禹惜陰而湯浴德兮
繫日進以無疆道既立而化淳
兮美光天之徧育如雲日之為瞻
兮統要荒而臣服大哉

帝德輝光被乎八埏允矣

皇風恩波沃乎四瀆爾其一日
萬幾宵衣旰食誦抑戒
陳無逸昧爽丕顯夜以繼日既勞
謙而匪懈亦健行而
不息勤問夜於未央雖寸晷而猶
惜若乃春居東以首
歲夏居南而執衡秋居西而司藏
冬居北而主成春動

也物以之起夏任也物以之生秋收也物以之結冬凍也物以之貞聖人推本萬物之理而欽象四時之行政刑準之以有度治教由是而皆平燠寒應候而時若雨暘順序而咸亨此吾

皇四時之勤政而用致九有之和寧者也又若政要書屏箴規刻珮日移崇政之餐汗浹延英之背彼古事之云遠睹今茲之盛代廼夕惕與朝乾用持盈而保泰信日是而弗遑豈臣鄰之可貳

聖主圖治以勵精庶政分司而用乂於是喜而歌曰九
鼎奠兮泰階平

皇風普兮庶物亨萬邦惟懷兮歌永清

帝心猶戒兮無荒寧朝夕兢惕兮象天行錫極敷言兮
惟至誠拜手稽首兮於王庭

萬壽無疆兮久道成

東郊迎春賦

震宮初動兮青帝司辰勾芒節屆兮木德惟仁條風入

律兮鳥歷紀新展東郊之盛禮兮觀畿甸之迎春既備
禮而備儀兮亦有則而有倫蓋欽承上帝而敬授於下
民者也爾乃迎春東郊既著於月令青珪禮神亦載於
周禮斗柄東指而萬物生地氣上騰而蟄蟲啓出土牛
以示農駕玉輅而虔祀於是服蒼玉載青旂宗伯前導
王公後隨有嚴有翼不疾不遲樂奏而凝寒頓減舞進
而陽和自滋於是歡迎白叟笑舞黃童夾道霏微而灑
雨平林縹緲而搖風喜鴻鈞之氣淑知大有之年豐自

南自北自西自東此皇都迎春之令典而萬國莫敢不
來同者也於是勅庶司決獄訟非終必赦惟祥是用象
暖律之發生乃省刑而寬衆又若降制詔勞三農助萌
陽勸田功法恩光之普扇布仁政以胥融於斯時也戶
裊綵旛簷飛輕燕柳綠綺宮梅榮芳殿和風拂兮簾惹
遊絲暖日長兮鶯啼睨金屏麗而帖寫宜春寶扇開
而漏傳玉箭溥禁裏之春光照閭閻而皆徧乃為之歌
曰迎東郊兮肅以將舞雲翹兮歌青陽乘時布令兮德

施長億萬斯年兮紀春王

喜雨賦

客有駕輜軒乘雲輅展軫乎南畝縱轡於東郊遨遊容
與徘徊逍遙爾乃白雲起乎空谷甘霖降於崇朝震雷
燿燿飛電爍爍乃往田舍而息焉有二三老人逡巡而
前曰斯雨之降時則時矣膏澤之濡普而施矣抑誰之
功乎請吾子明言以告之客奮袂而起曰猗歟休哉盛
世之民也飲其德而不知其力坐吾明語子方今龍飛

九五聖人在位德配乾坤功參天地精誠通於神明政教化乎萬類故上天眷命俾雨暘時若而萬方以治乃致含哺鼓腹耕田鑿井者實不知帝力之賜也老人曰聖人之德某既知之矣請吾子賦雨之澤及蒼生者可乎客曰若夫金烏收景層陰蔽空雷殷殷以振響電灼灼以搖紅鼓河伯之驚濤涌海若之幽宮瀉天池之巨浸走萬里之長虹遠迷三島近失千峯迴生意於衆卉消渴望於三農此則雨之方作而其勢最雄也乃其雲

開雨止霽景澄鮮山宛宛其染翠水蓊蓊其逞妍鳥嚶
嚶其鳴樹草芊芊其含煙柳暗歸鴉簷喧乾鵲槐影濃
分庭宇清花陰轉兮簾櫳薄纖歌動兮高樓紅袖飄兮
綺閣紺帙開兮芸編博山焚兮繡幕莫不欣膏澤之滂
澍喜雷聲之頻落此又雨之既足而萬方共樂者也至
若烏犍耕白水之涯黔黎藝綠野之畝白叟歡呼黃童
奔走土脉既滋兮禾麥如雲灌溉不勞兮田疇以阜爾
倉爾京爾荷爾負此又二三子所終日服事而知利我

之孔厚也於是老人倚杖而歌曰雨玉不可食兮曷若
嘉苗滿目屯黃雲雨金不可衣兮曷若五風十雨利耕
耘惟天降康兮稽首蒼旻惟皇感天兮永眷日勤千秋
萬歲兮樂吾之君

秋陽賦

有畏炎公子駕輕車乘駟馬停驂乎曲畛展軔乎廣野
見秋陽之高曝看流光之徐下乃油然而喜曰此其葦
收司乎三秋祝融謝於九夏故炎者變而為晶畏者化

而為愛也懸清大夫過而揖之曰公子之樂秋陽者徒以昔之炎爍今之清明也愛其溫和而畏其歊蒸也不知寒暑相遷而陰陽相生請為子賦秋陽之功而萬物以成可乎懿夫坤兌司方商金屬時潦收寒渚波淨橫池肅肅兮蕤氣森森兮梧枝姜芳蘭之茁茁燦黃鞠之離離於時日出扶桑耀乎東方六螭爰騁兮光熒熒而閃閃九道發輝兮氣灼灼而煌煌商飈助其清暉閭闔翼以高翔明無幽之不照朗無微之不彰爾其金門朝

啟玉漏初宣千官鵠立百辟鵷聯晃朗兮照帝座而明
衮宸熠燿兮浮鳳繖而映龍旂合璧兮彩煥抱珥兮祥
連魯戈返舍兮彼詭誕之徒爾漢世再中兮亦荒唐之
空傳豈若炳煥彤庭霽貢金之來萬國焜煌玉闕恍會
海之致百川哉又若六街三市甲第崇隆庭懸肆堵席
列千鐘當秋日之清爽兮喜拂筵之金風愛蜿蜒之六
龍兮惜光景之融融緣隙通輝乘虛炫彩園林掩映以
潔清庭宇當空而爽塏散菊圃之叢金霏桂苑之珠彩

信照耀之無私而盈虛之莫改亦有黃雲滿目稼穡在
望多黍多稌千倉萬箱朗旭高懸兮舒農忙之炙背肅
霜惟時兮屆穀麥之登場歌堯年兮大有樂舜畝兮盈
筐至若榆關罷戍玉塞晏兵萬里寒光兮生鐵戟三邊
曙色兮動危旌喜烽烟之久息俄懷鄉之念生爍彼瑯
弓耀茲寶鉞莫不壯戰士之雄心蕩邊氛於窮髮乃其
林泉曠達隱士高人此日兮何日幽蘭兮可紉霜零我
園兮秋早露泣我徑兮清晨美朗日之一照旋洗垢而

滌塵是察察而皓皓者庶比潔於秋是於是公子撫掌
而歌曰秋容淡兮秋日明冒萬物兮晶以熒惠我百穀
兮登西成吾欲繫之兮以長繩

燈花賦

夫何三冬之夜永兮聽玉漏之丁丁耿宵寒之不寐兮
羌讀史而論經對銀燈之熠爍兮何用夫隨月與囊螢
松風蕭蕭於戶外兮爰閉窓而掩櫺獨兀坐於幽齋兮
顧詩書之是娛引短檠而置前兮瑤篇卷而復舒注膏

油以續餘燼兮光燦爛而是如何生意之忽發兮開花
朵於斯須曾不根而自華兮焰炯炯而扶踈萼蓓蕾而
金輝兮葩晶熒而錦敷丹艷灼灼兮火藍煌煌離精發
瑞兮內隱外光飛蛾嬉其來往兮恍如蛺蝶探擷乎春
芳乍蔽乍虧兮若續若離匪青匪綠兮叅錯葳蕤可遠
觀而不可近玩兮花無葉而有枝歷四時而皆榮兮又
如火蓮冬秀乎雪池爾乃釵綴玉蟲兮枝堆寶粟光炫
纖細兮影搖帷幕度長夜之迢迢兮喜銀缸之續續靜

對而意蓋欲生閒吟而筆花交錯方作伴於形影兮信
有佐於誦讀若夫庭燎通晨九華達旦雞踏蓮花之巧
龍銜火樹之艷麗乎未央之宮燦乎承明之殿斯金闕
之壯觀豈書齋之清玩又若帝城三五上元佳時鼇峯
千仞金蓮萬枝緡綵與繁光共絢銀花與寶炬爭奇固
游觀之雜還非靜賞之所宜乃為之歌曰幻非幻兮色
可親實非實兮報先春朗瑤室兮席上珍照芸編兮日
月新

鳳凰來儀賦

以聖化感孚泰平瑞應為韻

惟

聖皇之建極兮膺九五之寶命沛仁恩於四海兮教化
洋溢乎萬姓天不愛道而地不愛寶兮百福畢致而延
慶乃威鳳之翔集兮符

一人之神聖嘉彼休徵應我

王化向畿輔而高騫覽德輝而載下惟羽族之三百實
超羣而莫亞

聖德惟純祥禽潛感稟鸛火之靈曜資和氣之融暖信
鹿後而麟前亦雞喙而燕頤必梧桐之是棲非琳瑯而
不嗽爾其九苞六像兮五色紛敷戴仁纓義兮蹈信惟
孚負禮向智兮順德不渝晨鳴賀世兮飛鳴郎都行鳴
歸嬉兮止鳴提扶是皆斯禽之神異掩餘瑞於瑤圖者
也若夫黃帝阿閣之巢雖雖喈喈帝嚳六英之舞萋萋
翩翩虞廷來儀而神人格岐山和鳴而聖道泰孰若當
邳治之休明集

王畿而遠邁曠千古而一覩昭德感於

聖代是以六府治九功成金甌固泰階平上瑞駢臻歡
聲徧乎閭里嘉祥疊奏喜氣達於寰瀛乃為之歌曰鳳
凰來兮

皇之瑞集天畿兮拱

帝位

帝德光被兮靈祥萃

聖心彌寅兮勤自治敬

天貺兮罔或肆又歌曰吉士藹藹鳴鳥協應曷由臻茲
我

后德盛萬有千載遐荒安定

重修

闕里文廟告成賦

丕鑠惟清

聖祖神宗既承顯之式穀允精一而執中欽明文思克
讓允恭洋溢溥沕萬國來同

皇上御極是法是則煥天下於文明登九有於衽席重
道而

先聖是欽崇儒而

素王惟式

天鑒孔昭佑我

一人謂闕里之經營既久斯尼山之廟貌宜新藉締造

於昭代貽制作於

聖君

天子乃命司空勅匠作爾經爾營乃量乃度走羣靈而
驅八神鳩工徒而諮衆略劉無閤不注之巉巖伐泰嶠
嵩高之參錯良材川委大木神輸授模定式審方辨隅
陶埴鍛厲之俱備丹青圻治之咸臚凡工倕與匠石莫
不奏技而待須爾乃日嘉時良爰動磬聲鋪徒奮力獲
人充盈既曄曄而薨薨亦登登而馮馮大冶耀兮金煙
霏屑噴兮瓊英斧斤丁丁兮觀球度之胥法繩墨綿綿
兮看約椽之咸平矯枉兮既直削腐兮用貞曉晷素素

畫杵勾勾俄而確輝玉碣采煥雲楣豐融曼衍揭業陸
離祕殿聳兮盤鳳傑閣矗兮卧螭何巨麗之方建乃卿
商之呈奇曜藻流光兮鬱蒨而承日麗懸華曳紫兮紉
縵以布天垂斯固天文與人文並燦聖居與聖澤偕丕
者也若乃級層階於東西拱修廡於左右大成殿大成
門實

御筆之親書聖時門弘道門更

睿思之口授圭瓚俎豆之式新犧牲幣帛之加舊添配

祀之羣賢增執事之奔走色瓦頒自尚方

御碑摹以重鏤丹楹列乎環材采楠揭乎纖繡則其為
狀也邈穹窿以宏壯亘碑磷而窅冥殖殖兮其庭噲噲
兮其正宏卓爍以輝赫兮若燭龍蜿蜒而鬚鬣紛攢羅
以歲魄兮若巨鼇鼎鬩而崢嶸斯翼斯棘兮屬閣道之
駸駸如松如竹兮衛鈎陳之縱橫倣巖廊而布象準魏
闕以為程礪磴既堅知為高之基下綺疏交映悟立誠
之牖明至夫既落既成乃祭乃饗

命皇子而徂征昭

一人之敬仰牲牷肥腍黍稷豐穰衣冠肅恭進退雍容
籩豆既旅樽壘斯崇以間兮笙鏞於論兮鼓鐘神既安
兮和冲降多福兮隆隆蓋尊聖之典無以尚統前後而
莫有或同者也於是為之歌曰堂皇靈宇

天子是新既輪既奐乃璠乃璵杏壇葱鬱檜幹繽紛宣
聖是安佑我後人歷億萬禩丕煥斯文

御製樂善堂全集定本卷十一

欽定四庫全書

御製樂善堂全集定本卷十二

賦

萬壽日慶雲見苗疆賦

惟

皇清肇三韓而定業聳盛京以立基既應天而昌運亦
撫民而順時

世祖白旄黃鉞仁義興師於是乎撫有四海宅燕京而

嚮離於皇

聖祖作則生知正義育仁以馭世制禮作樂以定規六
十一年之湛恩渥澤逮我

皇而克享其雍熙丕鑠

皇德

聖祖是式精神通於神明聲色允其恭默勤政亶乎八
年至仁孚乎萬國擊壤者歌何有之帝力含哺者順無
為之帝則

昊天曰明鑒我

皇情何祥弗應有瑞畢呈乃撝謙而自牧更持虛而若
盈或歸

親而不居或讓美而弗稱斯固

一人之大德巍巍蕩蕩而難名者也歲在上章月惟淵
獻

帝澤均施

皇風普扇坤輿載闢紅苗允致其共球版籍初登六里

亦安其服甸乃宣布化誨之初辰寶誕降吾

皇之聖旦鴨保寨之大吏初臨地良坡之苗民同忭池
河營之猺獞咸臻萬榮江之老幼共見異地而

王命頒陳同時而卿雲燦爛歸誠之愚民稽首何異華
封之祝三宣意之將吏傾心允似嵩高之呼萬氤氲捧
日劈碎錦之千重縹緲麗天幻榮光於萬變為樓為閣
拱黃道以旁敷非霧非煙被清風而不散五文絢彩於
璇霄十色流虹於碧漢此重譯之來不聞奏於越裳七

旬之格不聞歌其紉縵者也況於嘉時正午恰當

景命之辰歷未及申允愜綿長之願彼夫升堂於黃帝
之時起河於伊耆之代入房於殷湯之宮浮洛於周成
之載穆天子之王母為謠漢武帝之泰山紀再或一色
而無文或旋聚而忽分豈如歷三時之久當聖壽之辰
現新附之地昭歸化之民又何足稱函關紫氣帝鄉白
雲哉乃為之歌曰於赫

聖治兮格於

蒼天嘉瑞聿昭兮於彼苗田格愚孚頑兮王化普宣祝
我

聖壽兮億萬斯年

為善最樂賦

居空齋以探索兮繹書史之幽深感前芳之美則兮羌
遺予以嘉音渺管蠡之窺測兮天與淵其難尋惟茲善
之具備兮信足悅夫吾心伊吉甫之清風兮謂有物斯
有則民咸秉此天彝兮孰不好是懿德私與欲其相爭

兮天良因以窒塞致儵忽之鑿竅兮感渾沌之戕賊譬
望舒之圓滿兮蟾蜍乃以侵蝕智者覺以先反兮愚窮
年而終惑解迷途之往轡兮迴余御於中達駕言騁乎
義路兮謂先聖其可師紛既有此內美兮胡為汨以外
務也何既知而弗由兮夫唯己未克之故也味宣聖之
教淵兮禁視聽言動之非禮既天君之泰然兮百體從
而受紀斯已善之可樂兮樂孰能以愈此彼友朋之輔
仁兮亦示我以周行日相親於理道兮羗容與而相羊

發我蒙而鍼我疾兮善日進而無疆嗟蚩蚩之庸衆兮
昧虛靈其如狂忽背禮而棄義兮乃智力之相強資叢
施以為美兮謂蘭蕙其不芳彼是非之顛倒兮夫何樂
善而日將緬東平之脩美兮為炎室之宗臣帝問王以
何樂兮王惟樂善之云高宮崇隆以入天兮綴珠玉而
為珍詞士紛其侍座兮姱女翩其奉巾露鷄臙熊以為
羞兮華文黼黻之錯陳何耳目之不移於玩好兮乃惟
德之日新吾將從此以尋樂兮庶澡浴乎眇身

良玉比君子賦

焜彼太璞有韜其精蘊茲良玉爾晶爾瑩潤林薄兮凝
秀輝罔變兮挺英伊美德之莫匹吾將配君子之潔清
爾乃涅而不緇素有餘也廉而不剝堅如初也珪以為
瑞軼砮砮也珮以致飾章衣袵也庇蔭嘉穀用弘敷也
氣比白虹光發舒也文質彬彬德均如也君子比之於
馬自鏡溫潤其形密栗其性一塵不雜無疵類之可尋
全體胥瑩有光華之交映夫何大璞之不完而匿瑕之

為病哉

指佞草賦

銅龍曉啟玉漏初傳氤氲曙色縹緲祥煙朝萬國之球
壁列百辟之班聯爰有靈苗曰指佞草非時不見實天
地之無私應候而生允皇王之有道則見夫峙丹陛而
葱菁秀彤墀而縹緲金莖露灑潤貞幹之稜稜玉殿香
凝靄斜枝而裊裊無心而應獅冠之觸何殊有佞則知
金鏡之洞已早至若元愷登而憚壬化明良慶而庶績

熙雖間生於堯代寶藏用於明時對右平兮左城承日
照兮風披千官劍珮三殿威儀則屈軼亦呈其瑞而已
矣又安得夫邪佞而指之

松竹四時瀟灑賦

以題為韻

觀鴻濛以元探步庭砌而從容伊植物兮不齊固賞心
兮莫同或春榮兮秋萎或冬枯兮夏豐則有蕭蕭翠竹
落落蒼松勁枝憂玉貞幹蟠龍歷寒暑而妍媸莫易冒
冰雪而綠蔭偏濃得天地之正氣乃吾心之所宗若夫

蜿蜒擎空扶踈繞屋不羨五株之封兼有數竿之綠三
友稱號仍須林氏之梅三徑標名更待陶家之菊呈彼
秀姿動予雅意匪賦性之或殊實秉氣之獨粹森森挺
翠鄙木主與花奴蟲蟲凌虛策桃三而李四於是潛意
清心凝神構思而賦曰偉坤元之播育何磅礴而無私
羌松竹之清勁獨秉性之不移峙泰嶠而雲霞並繞蔭
淇澳而風雨咸披伊何人斯移植助我興兮猶夷暮靄
朝煙之際輕風淡月之時柳絮因風每遜榮於冬日芙

蓉貼水難競美於秋朝况乎飄風弗弗暮雨潇潇嗟柔
紅分嫩綠或墜瓊兮隕瑤惟枝篠之挺出恒歲蕤而莫
撓故曰逞妍者易摧仗節者不改宜賞之以吟哦樹之
於爽塏照晨暄之煦嫗潤宵露之沾灑惟四時而如一
是松栢之所以乃

帝賚良弼賦

昔在高宗踐丹宸之位居紫極之宮志恭默以思道心
殷憂其如忉何精誠之弗懈允帝載之潛通神悠悠其

若往夢忽忽而凌空於是陟崑崙歷元圃遊碧落之庭
升玉清之宇謁乎上帝既拜且舞乃致詞曰惟川有水
惟舟濟之惟鼎有羹惟鹽梅脩之帝集命於臣武丁將
俾三無而治之臣恐德弗類請賚良弼以貳之帝乃命
巫咸冊之曰若有人兮山之窈雲戕戕兮波渺渺清明
兮其躬怡悅兮其貌資汝武丁以佐有道俄而曉鐘催
曙漏箭停傳乍迴清夢恍憶前緣爰徵繪匠造進廷前
肖乎獨見之容訪其惟似之蹤而說也乃在傅巖之野

傭築之中既威儀之不忒知經緯之靡窮置之左右相
於厥躬允啟沃之是賴資誨諫以折衷金之礪兮差可
比木之繩兮將毋同是知天之載兮無聲無臭誠之通
兮無感不就惟高宗之聖敬日躋斯上帝之賚賢若授
彼神道設教之言蓋執理而疑誠不似密而實漏哉

天爵賦

帝渾沌之苗裔兮全衆美而尊安伊冲氣之絪縕兮胚
渾司乎五官處方寸之福田兮闢靈臺其洞寬宏泰宇

之坦途兮施耳目之屏翰蹈中正而為轍兮何姦匪之
能干紛既有此內美兮乃上帝之鑒觀帝用嘉其完備
兮詔天君其聽焉若曰予有四德厥首惟元廓然無我
順應無偏是用錫汝莫或不全在事有宜在理有義應
酬裁度發強剛毅是用錫汝外以制事節文之詳厥惟
有禮清明在躬中立不倚是用錫汝以綏福履人為物
靈惟智盡之是非臧否洞然不疑是用錫汝以揆厥時
惟是四德服行毋怠惟信之功大小咸在是用錫汝動

罔或悔心官既受此五爵於上帝也乃再拜而言曰皇
天無私兮賦德在躬五典有秩兮委任實隆期篤守而
莫忒兮副簡命於蒼穹庶天職之常保兮弗憧擾於朋
從

相馬賦

伯樂過冀北之野見羣牧馬在垌之野在阜之岡惟駢
惟騏有商有皇長嘶兮于林之下低飲兮在水一方或
伾伾而繹繹亦祛祛而彭彭雖騏驎之在望恐驚胎之

相妨於是舍舉肥用心鏡不觀其外附之毛獨察其內
秉之性窺其心兮不趨於險相其目兮惟視乎正以之
御兮則既佶且閑以之馳兮則進退惟命是蓋獨擅駟
駟之場而所謂馬中之聖者也於是飽以甘芻浴以清
水既範我之馳驅可不加夫鞭箠星角目兮電發鐵蹄
蹄兮風駛耳鳳聳以雙峻鬐龍騰而孤起蜿蟺堤陌之
間徘徊閭闔之裏是雖斯馬之迴異亦因斯人之知己
於是呼造父招王良騰六合歟八荒朝稅駕於咸池暮

返御乎扶桑顧羣鷺而若遺繼後塵而難望蓋養之者
有方用之者有矩節其力而不勞因其時而不苦不然
者何異於撲緣之拊而東野之舞哉

九日登高賦

歲九秋之暮月兮天肅霜其寂寥義和倏忽而躔在房
兮又值重陽之令朝何景物之慘悽兮萋草木之蕭條
悴繁綠於寒渚兮萎柔紅於荒郊命駟馬余阻征兮駕
言往乎山之椒凌高巒而遙瞻兮度迴壑以逍遙既流

眇於平隰兮見落日之還舉鴻雁翩翩而來賓兮聽霜
翻之脩脩至若龍山高會颺館傳觴楚臺馬戲沙苑鴻
翔咸宴凱而吟詩兮仰清風之高遐何好事之傳說兮
獨稱落帽之孟嘉今視古其猶昨兮羌節物之堪誇聊
容與而徜徉兮請採佩乎萸華

五日角黍賦

歲辛亥月天中客有以角黍請賦者主人曰唯唯昔在
三閭大夫抱孤忠而無貳矢靡他而莫移悼方正之不

容羌殷憂之日離騷芙蓉兮木末採薜荔兮江湄浴蘭
湯兮詎潔乃浮游塵外而自投於汨羅之涯蓋仲夏之
月而正陽之期也於是楚人哀之截彼竹筒貯茲糯米
塞以楝葉縛以綵緹望水濱而相投亦社祭之變禮今
角黍之制乃出於此也客曰此夫人而知之矣更請進
馬主人曰伊五月之為卦實下巽而上乾惟五陽其既
盛乃一陰之是旋觀菰葉之裹米方陰陽之包連此亦
扶陽抑陰之意而聖人之大道存焉若夫煮龜之骨為

菹烹驚之羹以薦百索之號徒傳九子之名空擅既無
取於懷賢悼古之風更無涉乎扶陽抑陰之善雖養口
體之微亦不可以不辨

六藝賦

居高齋以遠紹娛情志於典墳藉義府之息游望宮牆
其聿新伊六藝之為懿雖宿儒而必親余下學其何知
敢玩愒而不遵矧夫禮緣情以制物樂平情而返初射
必先乎正直御必範乎馳驅書貴六文之不忒數窮大

衍而有餘於身為終始之伴於道為行邁之輿請為言
其美備俾達者其聽諸原夫禮儀三百威儀三千既安
上而治民亦緯地而經天其制之也必傳道之聖其行
之也必守道之賢郊廟有饗祀之典朝宁有聘會之虔
尊尊則衣冠拜舞親親則酬酢蕃駢尊卑賴以等殺進
退恃以周旋是蓋禮之大者而其細尤莫能以盡焉粵
自軒轅雲門定樂溯源必本於中和相濟必分其清濁
以歌則管聲噦噦以舞則鶯羽翯翯五音六律之交宣

八風九歌之相續審音兮既換羽而移宮吹律兮復度
商而揣角入耳兮踈心以釋傾聽兮欲心以平雖宜觀
於韶舞必先放乎鄭聲以宣民志以和民情惟樂舞之
至正斯風俗其可成若夫敦弓既堅四侯既均可緣此
而觀德亦因之而序賓在澤在宮必有一定之制少筭
多算難紊不易之倫騶虞之節兮天子所用貍首之風
兮諸侯是陳慎其所舉取制於中聖王合射以明教男
子蓬矢而桑弓在昔宣尼曰執御矣平心正體兮在茲

自下奉上兮以此四黃既駕兮總轡分鑣兩驂不倚兮
過都越鄙追電兮逐風發軔兮殪兇鄙組舞於東野羨
辭乘之王良愛遽瑗之過關馳造父於康莊孰謂御為
賤役非君子之所方哉至若畫始義皇字肇蒼頡史載
觀於蹄遠易稱代乎繩結百官以治兮宣猷萬民以察
兮仰哲追書契之大明快苞符之盡洩於焉籀斯造乎
前驅義獻繼乎後乘文皇飛白張顛草聖顏柳法嚴蘓
黃筆勁雖歷代有作者要悉歸乎心正乃若司天之職

推步萬端黃鐘定其分至玉律辨其暑寒既參天而兩
地亦稽坤而考乾下至內府外府之歲會郊人廛人之
定田無一則何以成十有百則至於累千參伍而其法
備錯綜而其數全豈若商鞅近功始按人而立稅弘羊心
計算舟車與緡錢蓋所以裕國計敬昊天惟損上而益
下乃自古而云然懿茲六藝用藉尋求若行遠兮駕車
若溯川兮泛舟嗟不學兮面牆期佩服兮優游庶不忒
兮我心用龜勉兮前修

日方升賦

伊蒼旻之懸象兮煥二曜之重明麗中天以臨照兮終
萬古而健行分宵旦之行藏兮仰瑞應於升恒維光華
之烜爛兮百昌欣以向榮偉魄淵之繼照兮請仰觀旭
日之方升明萬彙其伊始兮符天心之生生方其玉繩
罷繫斗杓收指望舒隱曜以西馳啟明藏輝而遠徙覽
東方其生白眇海水而煥紫滄溟罷浴駕羲御以遄征
火馭載臨邁天衢其自此璇圖不忒兮正羲仲之寅賓

玉律無差兮合容成之步晷銀蚪渴兮燭龍翔陽鳥飛
兮曜靈揚出渤澥兮經若木歷暘谷兮拂扶桑瀛海燐
燐洗寶輪而皎潔咸池炳炳拱神鏡以汪洋玉衡隱約
兮低度瑤華烜赫兮含章照彼鮫宮添輕綃之晃朗射
茲龍窟增寶藏之輝煌則見金門初啟玉漏停傳天鷄
喚兮報曙寶鼎列兮生烟陽侯執轡兮炫彤墀之璀璨
后羿揚麾兮催青瑣之班聯雲旗縹緲兮映百川之會
海霞車陸離兮靄萬國之朝天此出震一人之有慶嚮

離敷治以無偏者也至若六街香霧九陌紅塵曙色方
升晉謁之驄駟駟晨光乍爛計偕之車犇犇瞻祥光之
錯落覩瑞靄之氤氲此王路馳驅之士鸞翔鵲起而欣
欣者也又若幽人曠逸竿甫逾三學士清嚴輒未倍四
梳翻雲髻兮曉景透乎香閨經開貝葉兮晨鐘鳴乎古
寺舟橫野渡兮驚月落而烏啼獵合平原兮喜黃牽而
蒼臂草木向曙以敷榮飛走和鳴而得意此又臨照無
私恩光遍及於萬類者也斯時也後天一度而輝燭於

大荒出地咫尺而宣耀於無疆夜光無所施其用火齊
無可耀其光杖何為兮誇夸父戈何為兮稱魯陽郭何
用兮其豐繩何施兮其長考盈虧兮何與驗中晷兮無
妨若太極兮始判而將分如元會兮方流而未央又何
必記合璧於伊耆之代舉抱戴於晉帝之堂侈談王字
之瑞徒稱五色之光哉客有興寄泰山之嶠神遊日觀
之峰覩初陽之煒煜攬顯氣之冲融開懷抱暢心胸鄙
熊曜瑯琊之跡追青蓮登眺之蹤將遊心乎太始觀造

物之元功

瑾瑜匿瑕賦

爾其林薄生光岡陵煥美矚寶氣之爛然知太璞之在
是命彼良工呈其巧技既剖既琢成文成理雖連城之
比價亦微瑕之在裏磨為器允稱夫圭璋調之音甚和
乎宮徵若精求其瑕輕棄其瑜則以分寸之痕翳累徑
尺之瓊琚譬夫水至清無魚人至察無徒故求全者舍
細謀大者略小不瑣瑣以求明不察察以致考瑾之珣

弗以否而混臧瑜之瑕掩其裏而揚表用成韞匱之材
為彼希世之寶尺有所短寸有所長伊尺璧之為貴詎
點瑕之足妨程材以辨器舍疵而取良願寄言於銓才
銘座右而莫忘

水輪賦

削竹為管採木為輪假廣川之利潤代膏雨之宏恩因
時制宜奚必資乎匠伯澤民利物乃有待於梓人爾其
東作云興西成在望大田多稼或懷旱魃之憂密雲不

雨每厘是天之貺雖抱甕之勤奚為即挈瓶之利亦讓
於是轉岸上之飛輪汲江中之巨浪方來旋去設機軸
之周環已納而吐欣洪波之奔放劃如雷鼓之聲翩若
飛鳧之狀揚清激濁兮大澤旁通救患分災兮連畦滋
暢鄙桔槔之小惠殊轆轤以致功匪疾匪徐兮運旋而
不竭突如來如兮灌注而莫窮盈科而進兮施有次第
轉轂而輸兮用無始終流洋洋兮比潤甘霖苗薿薿兮
同舒律暖垂稻穗兮壠畝勻黃築場圃兮籌車載滿是

知輪者木之體既巽順而有功水者坎之盈亦剛中而有信相資以濟引重之象何殊因物而施救暎之功以迅敬陳澤物之奇勲用備風人之雅訓

白鹿洞賦

流鄱陽之洪浸峙五老之奇峰星分軫翼以上耀境接吳楚而旁通諒地靈之所聚實間氣之攸鍾吾聞山蒼蒼其含翠水渺渺其如油松濛濛而黛蔚石磊磊其雲浮伊眠鹿之町疃乃是創而是修架修椽以為屋聳高

構而成樓聚羣英以遊息惟古訓之研求陸有登鄒之
履水有泛泗之舟想前修其未遠知遵路之所由是地
也李氏為之開先晦翁為之善後講一理之淵源致四
方之奔走既道藪而學淵亦書左而史右絳帷捲處月
霽階前書帶抽時翠迷洞口緬遺蹟於匡廬仰先賢之
啟牖此嚮風者所以爭先而至今長垂為不朽也

御製樂善堂全集定本卷十二

欽定四庫全書

御製樂善堂全集定本卷十三

賦

文戰賦

甚矣人之好爭也軒尤鼓怒於凶器羿浞鬪技於霜鋒
賁育逞力於舉重般婁恃巧於雕蟲良增驚智於劉項
儀秦馳辯於橫從是蓋所居者高則惡人之我並所操
者異則嫉人之我同未有解構釋紛齊天地於一指和

光同塵歸大化之元宗者也吾意文人學士知命樂天
謙卑自牧慎重為先其游心於淡也若太羹之味其麗
澤相滋也若共濟之船宜其煦煦為儒魚魚為賢不惡
我之或後不憎人之或前而孰知所謂文戰者更有甚
於前言當其屬詞鋒排筆陣萬夫之雄莫擬六籍之奧
並進徹札之鏃必期乎中堅露穎之囊何妨於游刃鷄
視而張弛咸宜虎變而雷霆用震於是綰帙繽紛盡作
鼓輦之響絳帷掩映俄興旌旆之思呼十二之龍賓發

攄奇策揮五千之文字奮迅偏師臨局早分其勝負當
場疊用其正奇弟子降心而歛手先生談笑而解圍是
蓋厲兵於學海藏甲於文山請纓同弱冠之子投筆似
定遠之班硯石如砥兮紀功莫盡霜毫飛白兮露布爰
頒齊物子見而笑之曰是蓋以文為戰者夫文以載道
而又何戰乎請與子解干戈之擾而歸洪荒之都

望嶧山賦

居義府之邃深兮藉藝苑以遨遊慙脩綆之汲古兮羗

魄淵其如流邈高山而景仰兮余獨媿夫前修天中志
以日征兮庶自畫之免羞聞嶧陽之箴峙兮厥維在乎
東鄒余仲氏其再經兮為余道其緣由于車氏之故墟
兮溯芳軌之尚留欲躋攀以顧瞻兮阻川原之亘悠爰
徘徊而永念兮運綺思而裁句於麗則乎何有兮名望
嶧山之賦昔神禹之任土兮取茲陽之孤桐魯僖公之
保有兮乃遂荒於大東固坤輿所鍾靈兮氣旁薄而莫
窮配浩然之至正兮挽戰國之頽風卑衍詭與儀辯兮

非大丈夫之謂也排楊墨之淫辭兮曰維正道之足貴也丁鉅艱而獨往兮邁仔肩於千載也其功不在禹下兮斯言確其可味也惟樹德之既堅兮吾獨羨夫孕育之所由來奚必誇夫川原之綿衍兮侈形勝之崔嵬重曰望嶧山兮魯之邦隔千里兮天蒼茫竊仰止兮路修長慎自邇兮勤就將拍余駕兮息彼鄉徬尼山兮猶可望

迎長日之至賦

惟大祀以事天爰考候而迎日時履端於方始迓初陽
而誠壹既展奉常之儀乃協用牲之吉稽古之典黃鐘
正應乎宮縣行夏之時葭灰亦飛乎緹室蓋所以欽承
上帝宜調象緯之平布政萬方必始璣衡之一仰斗柄
其始旋望扶桑而將出斯日也符上春以備儀詣泰壇
而將祀迎祥迓福兮必惟其時導氣延和兮爰修其始
遲遲暖律與圭影而並長烈烈凝寒避爐烟而自徙豈
惟靈鼓之聲不止陶匏之禮維父天而母地實覃誠而

在此是知經紀不忒乃貞明之有常疾徐中度胡躔緯
之失次盖日者陽之精君者德之成表著明於君象乃
致敬而用迎萬國共球望金門而和會千方輻輳仰旭
日之長明羣僚景從而有秩千古輝煌而莫京斯固一
人法天而有慶九有戴帝以咸寧者也

景陵瑞芝賦

盖聞王者孝慈則芝茂又曰君有至德則芝生仁恩覃
敷於率土草木爰叶夫嘉禎考夫瑞應之圖稽乎符命

之經未有治功允協乎邳理而祥應不驗於山靈者也

欽惟

聖皇御世敬

天法

祖煦嫗之澤比陽春汪濊之恩如膏雨亮功則克諧三
事歌叙則允治六府凡溥大化於雍熙悉循

聖祖之遺矩

上帝是鑒靈瑞斯頻河清海晏之紀麟遊鳳集之文與

夫嘉禾甘露之迭見蓋不可以指數陳是皆

一人格

天之元功而厚澤永逮夫生民者也乃若瑤光發辰象之精金色吐陰陽之秀衍

鼎湖兮億載休徵

福地兮萬年鴻祐續紛芝彩表

聖祖盛德之常新煥爛芝房驗吾

皇孝思之孔厚金枝瓊葉浥瑞露於

寶城十色九光燦祥霞於仙囿鏤珊瑚而作榦葩蓋高
擎肖龍鳳以呈形卿雲低覆氤氲並日月以爭華蔚靄
與松楸而並茂豈與夫生於石室產自珠宮王母之臺
虛紀宓妃之館成空秀甘泉之庭而傳誇晉帝產延英
之座而稱美唐宗也哉

聖聖同揆德惟其至既丕顯而丕承信格

天而格地嘉祉効乎百靈景運凝乎二氣謹拜首而颺
言賦太平之至瑞

五絲賦

律中蕤賓時惟臯月賞天中之令晨值薰風其南發撫
茲佳景浴蘭爰遍乎寰區文此太平競渡亦盛乎楚越
乃有金閨雅製綉幕芳思不止線添對日長之何遣聊
同錦織象雲爛以交披憑茲十指運彼五絲觀寶縷之
續續粲文采之離離延壽算於萬禩傳勝事於一時爾
其香奩纔罷彤管方陳麗學天孫之樣巧開地臘之辰
鴨綠鵲黃選色而艷分八彩淺紅深紫成章而手拈雙

紋皓齒含霜意運神工而不語青蛾歛翠心追天巧而
宜嘖鶯其羽鶯其領難比方其爛熳絲五紵絲五絨更
觸緒而繽紛則見夫續比貝連艷羞花朵色如蝶螈迴
射乎虹橋舞比羽霓直通於馭娑瑤筐用盛錦袂是裏
方携蒲酌願萬年以祝君亦比葵忱藉一綫而達我重
曰當午日兮結五絲綜萬緒兮抽巧思綿寶命兮壽無
期紀歲華兮長如斯

稼穡惟寶賦

天之鍾異物也石韞玉而山輝蚌含珠而川媚金在沙
而待披綃織鮫而成瑞火齊共木難而交朗都梁與五
木而爭貴繡毯紅氍赤羽文翠固海舶之誇珍亦大賈
之網利者也然而饑不可食寒豈能衣惟土物之是愛
乃民命之所依希代之姿莫匹連城之價在茲此聖世
之至寶羌歌咏於周詩爾其既耕既耘既方既皁沃時
雨而霑濡熟西風而堅好珠顆滿車兮無慙照乘之光
玉粒盈倉兮絕勝瓊瑤之報故珍重上厪乎一人而滋

培全仰乎大造為植物之獨貴豈異賄之足稱勤耒耜
而莫怠謹播植而乃成爰藉亞旅之衆如施追琢之精
力作三時兮類藍田之種玉有秋不日兮誇赤水之求
珍異千倉與萬箱兮寧必不貪為寶慶崇墉與比櫛兮
懸知有道則生信饑寒之可禦陋瓊瑰之為輕不假居
奇以市何須韞匱而藏餘滯穗兮伊寡婦之利匪異物
兮實餽貧之糧故曰寶金王者心勞而鮮益寶稼穡者
心逸而獲臧其為利也最溥其為物也孔良尚計九年

之蓄以期兆姓之康

南風之薰賦

祝融司方朱明應節蒸溽暑兮鬱陶遲火輪兮炎熱羨
萬物之敷榮坐池臺之清絕猗珍簟兮如霜皎冰盤兮
沃雪乃其堦塵初動羅幕微飄協巽方以律轉應鶉火
而候調出谷泠泠輕纔偃草入林習習響不鳴條蒲劍
刺波兮岸畔斜紫乎翠帶荷珠承蓋兮池心低曳夫紅
綃解煩襟於九夏扇清景於崇朝客有廣廈披衣北窓

延賞喜噓拂之及時欣凱樂之有象鬱佳氣兮氤氲埽
祥雲兮淡蕩爰符五日之期可卜三秋之穰吹來閭闔
何須辨其雌雄布自郊原欣可覩夫長養時也虞絃鼓
堯厨吹有道聖人之世無為郅治之時著物如薰疑度
籬邊香芷乘陽欲動微飄座上輕絺中八音之節族叶
三光之舒遲豈比夫蘭臺徒侈其詞華沛里空思夫勇
士舞掌中而懼飛賞亭畔而稱美彼宮殿但泛其蕙蘭
伊閭閭豈被其福履惟睿作聖惟風時薰宣和解鬱澤

廣恩均既揚颺於八表亦應候於五辰冬暖吹葭管之
律春和拂梅柳之津會南風之入夏尤遍被乎無垠斯
所以醞釀太和之氣而王者法之以施仁者乎

書同文賦

偉哉書契之盛也麗光天而有耀敷海宇而無垠掌之
保氏而肇夫小學觀乎人文而成彼大勲代結繩而為
治因載道以稱神洋溢之風普扇光華之治聿新書紀
遵道遵路記稱同軌同倫固草野咸欽其法式抑巖廊

用布其絲綸繫夫庖犧造書倉頡創字蝌蚪成形烏魚
誌瑞原所始作不一其類迨後八體漸分六書遂製或
篆隸而殊科或受戈之異制或偃露湧泉而稱工或離
星垂珠以布勢或揭象魏之條或質歲成之計或遊元
圃之麟或折蟾宮之桂莫不依乎典則遵我王章錯綜
以盡其術採撫以備其詳藻耀乎典冊之府輝煌乎翰
墨之場指事象形之中則協聲轉注之允臧潤太平而
有色宣文治於重光於是靖萬慮之紛拏布一人之大

化金殿春永而閣帖臨餘玉筆龍飛而黃麻草罷欲加
點而無有詎一畫之可假昭萬里之同風自一人而逮
下明廷敷奏曾無馬字之訛在野遵從何有魚書之詐
則知聖人有作書文大同自南自北自西自東光如日
月之燭遐屆舟車所通布章程於畫一闡治理於鴻濛
豈操觚而濡墨者徒工技雕蟲也哉

秋河賦

暑風退秋月明麗銀浦於碧落映金漢於丹京耿耿之

波瀾皎潔皚皚之氣象澄泓露下而天津可渡風飄而
微浪不生經漸臺而逶迤亘玉繩而清淺從碧海以分
來豈黃河之上轉入三秋以杳茫直萬里而曼衍深莫
測兮懸東井而昭回遠莫知兮歷南箕以舒展客有閒
庭容與梧砌逍遙感砧聲於野墅驚蛩響乎清宵眇明
光而寄興抒曠懷於沈寥夫其龍駕將臨星橋初起弄
機之女停梭河鼓之旂近止霞妝斜整映牛渚以非遙
閭道潛通望鵲梁而甚邇樂莫樂兮舊相知悲莫悲兮

久別離嗟陽鳥之欲上又天雞之早啼何絳河之傾而
不竭兮抑天限固若是其難移徒見夫皓如白練之披
皎奪景星之燦當霽夕而逾明吐霄光而猶爛興無邊
之秋思漫題句於紈扇

荔枝賦

氣稟純陽根植炎方燦瓊華之燦燦垂寶實之煌煌蔡
譜爰稽紀方紅與江綠白圖聿考誇雪肉與冰瓢領味
者歎為仙液觀色者驚若絳囊張公之梨難並美安期

之棗莫擅長江城之橘謗比擬瑤池之桃洵荒唐信乎
天下之奇產而果中之稱王者也爾其瘴雨初收炎風
微扇條密抽旗花開綴霰殆有積而後彰豈無實而自
炫翔彩鳳以輝煌合彤雲而絢爛紅丸萬斛紛玉樹以
流光神丹九成射瑤圃而掣電燕支顥顥欲盈闔客之
筐火齊纍纍乍佐番舟之宴豈云憇之者如雲葉之垂
寶之者無斧斤之患而已哉時惟遐邇同風盛德昭融
雖限山川之遠竟如堂奧之通彼宣風之大吏乃方物

之是共樹植皇州豈分幅幘之隔實垂上苑應知造化
之功賜出金門羣捧玻璃之盞恩分青瑣携歸筠籜之
籠此蓋叨仙味於閨苑而沐聖澤於無窮也夫其朱殼
纔分脂膚照眼朗若玉壺之水潤似清涼之散羌熱中
之始消豈病渴之用遣佐玉杯兮輕含白露之團列華
筵兮共賞冰蠶之繭唇未沾而已香手含潤而莫盥亦
何必羨嶺南之三百堆驪珠而滿盃哉

多稼如雲賦

出郊原而縱目愛金秋之氣清草霏霏而露濕天寥寥
而風生寒蟬收響陰蟲載鳴繡錯溝塍乍青連而散漫
綺分隴畝正黃茂以縱橫酬勤劬於東作告豐稔乎西
成遠而視之如膚寸之出石也近而睨之似朝隲之凝
碧也當夫公田既雨露膏澤之調勻嘉種徧敷披薰風
之順適厥田上上兮芒既抽而散芳實發芊芊兮花已
飛而帶白奄觀南畝之收何異西郊之積則見夫綿邈
鋪川豐融亘田層阜遙分似無心而出岫千畦遍滿若

奇峰之連天氣氤散潤兮既史書以占歲曼衍流膏兮
果戶慶於有年豈坻京之足喻恍蒼蔚之愈綿於時序
乃錢鏐築我場圃以樂農夫以御田祖豐滋漫若且聞
束皙之詩悅茂油然欣聽籥章之鼓方苞既實慶高廩
於茨梁堅好不秣喜盈疇之稷黍故曰穀為君寶惟農
是親遺秉盈場玉食亦登其芬潔餘糧棲畝金枝轉掩
其輪囷豈非聖德之格天而多稼乃得以如雲乎

聖德合天地賦

聖人膺寶籙握靈圖躋含生於富壽致萬類之昭蘇澤
允覃乎九有道克奉乎三無欽明文思帝堯無以踰也
溫恭允塞虞舜曷以加乎紀巍巍與蕩蕩信一揆而同
符天無不覆地無不載蒼蒼者昭丕冒之宏混混者順
發生之大窺博厚而難名測包容而無外是亘古此天
地也而誰與為對待哉王者中和位育並立為三規模
既同乎嚮載對越尤致其精嚴故升中於天而鬼神格
告成於地而恩澤覃茂以對時而行无妄卑以自牧而

體福謙於是歌一德之允若與二儀而昭合布政則溫
如春融育物則量同海納明如日也麗九華以昭宣散
如風也紀八節於閭闔然而高明既被朝夕彌虔昭事
則幾康是飭行健則元會永綿小心翼翼是曰法天若
夫廣大咸亨品物必遂既柔順而利貞亦履仁而行義
安土能敦是曰則地於是乎乾坤合德君師並修海宇
仰崇高之象羣靈樂靜謐之休徧尊親於血氣成參贊
之謨謀豈非與清寧而永奠合上下而同流者哉

鳥求友聲賦

暮春日永修禊風輕柳依依而始綠桃灼灼而載榮山
含翠而水秀雲觸石而氣清想羣賢之盛蹟追永和之
芳聲命我樽斚招我友朋既窺花而拂竹足樂志而怡
情乃有流鶯傍乎高柳乘春載鳴知時不苟既擇木而
遷喬亦因心而求友翺翔寡侶兮爰懷切切之思睨睨
呼羣兮用發嚶嚶之口枝頭乍轉兮念知我之猶希陌
上頻啼兮恨相應之恐後蜂蝶來往兮疑尚阻於羣猜

鸞鳳遙遠兮冀以引為吾耦歎離羣之已久謂知音其
可期友既不我棄兮吾亦豈不爾思自秋徂冬業過時
而已矣穿堤泛柳盡今日以求之取則寧遠流音在茲
莫使鵬鳥兮得讒言之是肆應同鳴鶴兮願好爵之與
縻乃其谷裏春深林間交訂始也以類而相求終焉同
聲之是應是謂其音既諧其志亦正爰符金蘭之契雅
合風人之詠彼夫烏衣國裏紅縷樓前叫邊秋之孤鶩
啼蜀月之杜鵑豈得義同金石韻佩管絃也哉

麥秋賦

繫鶉火之司令，親商金之屆期。影度朱明，始散芳於榴
圃；律侵白帝，獨抽穗於麥畦。愛芄芄之連纈，亦離離之
下垂。南畝正勤於此日，西成偏紀乎茲時。披梅風而含
穎，潤穀雨而雙岐。是蓋四時之代序，而萬物各遂其繁
滋者也。乃其堤上鶯啼隴間，雉雛芳草未歇，而猶霏綠
樹成陰，而始就何鉅艾之奄觀。今當隆曦之永晝，覩黃
雲之滿野。今驚白藏之應候，溽寒露而朝濡。今潛陰呂

而夕秀雜收歛於長養兮參結實於紛茂炎炎當令碩
碩成行紫莖兮韞爽青穗兮含涼大有占而豐登肇象
兮中和順而隴畝飛香對銀綃而偶穗兮散珠顆而分
芒豈非化工之獨運而為盛世之嘉祥哉

夏雲賦

夕陽退暑晚籟吹涼蟬嘒嘒其曳響榴艷艷其含芳揮
羽扇兮納爽坐冰簟兮生光既澄觀兮瀟灑爰延步兮
徜徉策杖清流之畔響屨疎林之旁見夫夏雲聳峰無

心出岫峩峩而其氣始升氤氲而其勢漸就晻霭罔巒
之崇蔽虧松杉之茂其方起也似迎日而流霞其上騰
也如凌風而散華其紛郁也狀綵纈而錦疊其輪囷也
類玉葉而金葩或現神女之佩或駕王母之車依稀漢
帝兮望祥而書紀寶鼎彷彿安期兮成仙而棗大如瓜
同崑崙兮五色突嵩少兮三花驅不勞鞭兮乍峭峰之
峩律斲何須斧兮已空竅之豁訝爾其炎蒸頓歇池臺
清絕抱翠石兮影留俯清波兮紋潔暝烟杳靄兮隔柳


岸以深沉餘景紛綸兮鏤殘陽而明滅思添槩几之清
病消文園之渴豈非覩鬱興之勢而忽解心中之熱哉

學問至芻蕘賦

原夫泰岱之高不讓土壤而尊五嶽河海之廣不擇細
流而納百川載萬物而不盈者曰地覆羣有而不居者
惟天是以有大而能謙必豫見善而能遷始賢固至理
之如此豈入道而不然蓋自先民有言詢於芻蕘既下
問之不恥乃大德之孔昭野無遺才英俊彈冠夫廊廟

政皆丕應庶人罷議於市朝固已五風順十雨調集濟
濟之多士覩師師於百僚然而謙謙君子延訪不遺夫
草莽穆穆元后諏諮乃逮夫薪樵是以禹下昌言之拜
湯勤有莘之招高宗恭默而得左右於巖野周公勤思
而傳吐握於崇朝凡其守謙以受益用是居上而不驕
爾乃設鐸設鞀而蒿萊亦及爰咨爰度而草澤無餘道
至廣也豈必備乎垂衣之主心之虛也乃旁求於戴笠
之夫邇言不棄良才必選大度於是乎彰隆業因此而

顯戒損用以持盈得師期乎主善此聖王樂取之誠心
而非徒規倣乎先民之舊典



御製樂善堂全集定本卷十三

欽定四庫全書

集部

御製樂善堂全集定本卷十四至
六

臣永瑤恭校

侍讀臣孫球覆勘

覆校官中書臣田尹衡

校對官助教臣胡予襄

謄錄貢生臣李樞

謄錄舉人臣李椿

欽定四庫全書

御製樂善堂全集定本卷十四

古體詩

古風十五首

天地有至德健順運萬善陰陽迭往來寒暑互流轉大
生而廣生疇能體其撰根柢祇一誠神功何易簡
羲皇初畫卦猶以結繩治後聖繼心傳法典興書契豈
徒充簡編即是傳道器君看六經中言言道仁義

有苗蠡弗率大禹爰徂征三旬猶逆命豈云無甲兵伯
益贊謨言感神由至誠惟昔號旻日克諧致烝烝文德
既誕敷遠人亦來庭動物物不動今古無其情

高宗求良弼簡在通夢寐傳巖版築人一朝履高位和
羹作鹽梅朝夕資納誨阿衡豈專美嘉靖殷邦治惟此
恭默思尚賢天所賜

隆冬無溽暑盛夏無祁寒寒暑協太和往來相推遷出
虫彼衆氓努力籌逢年我當惜寸陰黽勉期前賢

泰山不讓土河海不擇流為學亦如此取益在廣求見
惡當自戒見善期自修三人有吾師近取乃日休

孟山何宮堯有獸曰騶虞賦性本仁慈舉趾惜靡蕪終
為王者瑞見乃盛世符南山有猛虎食肉如食芻饒嗜
飽腹腸何論有無辜一朝獵者至咄嗟喪其軀仁殘天
道顯視此何所殊

銅鑑正衣冠人鑑別善惡人苦不自知箴規已病藥疑
事莫著揅疑謀莫龜灼但聽善人言萬事免乖錯

秋聲何瀟灑
琴琴刁刁然
吹萬忽奔騰
千里淡雲烟
振羽階下蟲
吟風樹上蟬
物類本無情
苑枯感變遷
謾說蓬瀛洲
居住不老仙
三山阻且遙
荒唐徒爾傳
我有不老藥
不用求金丹
清心與寡欲
可以延長年
嗟彼名利人
營營凋朱顏

郭公解布穀
王孫能促織
區區禽與蟲
因時亦有識
人生性本靈
充然備五德
私利一薰蒸
靈臺因室塞
譬彼瑤臺月
忽被蟾蜍蝕
克己萬理明
處事乃不惑

春風二三月花嶼爭芬芳出門踏青人車馬沸如狂芳
甸布綺席繡陌遺琳瑯幽蘭在空谷詎肯生道旁地僻
人莫賞誰識王者香我來採盈把歸植讀書堂同遊不
同趣對爾聊徜徉

平原昔聚客毛遂乃下列備數入強楚碌碌何分別一
朝脫穎出厯階騁辨說手招十九人從約自此決策士
且垂名矧乃匡時傑

燕昭用樂毅連下七十城惠王信反問全功一旦傾齊

威察毀譽左右計不行烹阿封即墨戰勝在朝廷外間
與內間一伺主疑乘所以為政者去讒心乃明

屈原沉汨羅孤忠光日表賈誼過長沙臨流抒懷抱楚
懷本庸昏漢文稱有道胡為志未伸悲歌賦鵬鳥絳灌
豈子蘭洛陽英銳早龍門作合傳孰謂善品藻

鳳凰鳴崑邱惟食琳與琅九苞耀奇彩天宇恣翱翔豈
比藩籬雀卑棲飽稻粱達人豈自枉鄙夫巧趨踰尚父
年八十猶自釣渭陽一朝遇西伯殊績展鷹揚是知賢

路闢斯為邦家光

新竹

新笋已成竹檀欒影簾箔風翻翡翠林露灑琅玕籜猶
然婉孌姿已具堅貞格蕭疎憂寒玉歷落吹竽籥長房
漫騎龍公輸寧飛鵲撫摩留仙人棲托遲鸞鶴梁園幾
萬箇盛事今寂寞森森階砌前添我興寥廓烟凝翠欲
流枝篠紛參錯莫謂無妍華歲寒猶可託

海子行園同聞之蔡先生五弟讀杜子美秋興詩

分韻得肉字

秋曉獵平原露重林如沐歸來息離宮繞砌開黃菊豈
以漫遊荒往籍閒披讀維昔天寶初楊李竊威福道旁
有餓殍朱門饜梁肉漁陽鼙鼓來驚破霓裳曲杜老時
隨征殷憂積誠篤傷心秋興詩令我勞往復硬語蟠虬
松蒼渾神味足錦江波浪愁巫山眉黛蹙何如屈問天
空同賈賦鵬遙遙千載心文園仰芳躅

關山月

玉門關外秋風清玉門關上秋月明
戍兒歸卜刀鐸鳴
離家見月幾虧盈
天河淨洗兵
不用早晚可得酒泉封
燕領將軍飛食肉
每同甘苦均寒凍
遙憶千家砧杵聲
舊衣未解新衣送
舉頭皓魄又重圓
邊笳四面方吹動

題李白太山觀日圖限韻

供奉沉香亭遣調
若鐘銑意在諷
色荒不獨詞華擅
五嶽峙霄中
礪難消遣長嘯登太山
日觀峯當面
東望滄溟洲
坳堂杯水轉
陽烏浴未乾
魚龍乘曼衍
扶桑已

三竿猶不聞雞犬遐觀小宇宙形勢天下選咫尺大羅
天天帝端袞冕叩閭謁通明從容陪玉輦醉踏青芙蓉
豈以佯狂免騎龍恣天遊白雲共舒展帝女賜錦裳聞
說冰蠶繭長鯨不復回奇傳類詭辨何人寫丹青壁上
裊香篆披時泰嶽雄收處滄波卷即此當卧遊悠然興
不淺

喜雨四言詩

明明

上天照臨有赫至誠克應無感弗格穆穆我

皇乾惕朝夕鑒在

帝心九有是宅

皇帝膺籙丕顯丕承洋溢暨訖被乎八紘民安其居物
樂其生爾畊爾桑以成以平

瞻仰

昊天昭回雲漢未曰如焚亦云微旱

帝心用憂徹懸減膳亦保亦臨曰明曰旦

有頌其絲有降其綸訪自三公延及百臣式陳爾言庶
裨我身用沛恩施以答

蒼旻

有暘其陰有毓其雷雲既油然雨亦沛哉曰霑而濡曰
滋而培自我京畿遍乎九垓

民鼓其腹穀潤於田溝澮潺潺沃壤洎洎匪以灌而鮮
匪以溉而妍

聖帝是虔致雨澤是宣

雨而暘矣澤則洋矣遍農桑矣碩且長矣萬斯倉矣供
明堂矣祝無疆矣

讀昌黎集

建安騁駢儷斯文體一變俳優務悅人靡軟風相扇自
此八代間羣言紛汗漫起衰昌黎公銳然負謗訕刑偽
還淳古籍湜愧流汗渤海收衆瀾斗建失星爛尊聖衛
藩籬幟樹先登岸因文道以見一語千秋贊

銅鼓歌

欽定四庫全書

御製樂善堂全集定本

雍正庚戌秋九月廣西撫臣金鉉進銅鼓一云
民間壑田所得名諸葛鼓相傳諸葛亮以鼓鎮
蠻云因歌以紀之

赤帝失御火不燔冠以苴履翻坤乾靖王後裔英且賢
慨然奮義振中原南陽之數卧龍蟠下車三顧意何虔
龍飛雲路見在田君臣相得魚水歡東使吳會騁辨言
八十萬衆成灰烟西入益州奠本根鼎足峙立固且完
永安宮裡龍髯攀調和官府整而閑命師南指定獍頑

七擒七縱服諸蠻鑄銅成鼓永鎮旃風雨侵蝕年復年
數易時代陵谷遷下巢蚯蚓鄰黃泉照臨無復資魄淵
濡潤還沾雨露偏崇鼎貫鼎增爛斑獨於厚地全其天
由來奇物終播宣一朝光氣騰荒阡施厥畚鍤瓦礫翻
有聲鞺鞳非絲絃宛然銅鼓形不刊洗剔苔蘚光澤鮮
驚看老幼何喧闐大吏表進

九重前為陳檀案撒包羶聚觀羣下充庭軒試加擊伐
聲噶噶大鵬搏風長鯨噴上有四蛤爭獐蹲旁有雙耳

綬色緼龜文虬篆隱隱存覆之黃繡加束純方今

舜目闕四門兩間並獻貞符繁不誇寶鼎出河汾詎數
綬氣冲斗躔我聞置鼓召諫臣訪察民隱牧元元此應
其兆無乃然坐見讜議日聯翩鏞鐘大叩張宮縣

讀貞觀政要

薰風何習習朱明居長候北窓高卧起洛誦勤時懋貞
觀政要編覽罷再三復文皇治世功在漢文景右斗米
值三錢太倉粟腐臭關東豎嶺南開門夜無寇論古緬

遐思治功非倖覲文貞立朝端彌縫而匡救九重亦虛
已勤政夜繼晷勵精圖至治俗用臻富厚二十餘年間
中外稱明后徵沒明鑑昏志滿漸差謬東征無成功幸
能自引咎復碑念前規厚賜撫其後猶不負初心終身
無罅漏信順立丕基尚賢天所祐先哲留嘉謨後人當
勉就

傅修期

昔有韜鈴士投筆願從戎終生美少年請纓志甚雄讀

書貴有用躍馬馳邊烽所在戰必克豈是虛譽崇偉哉
傳修期卓然儒將宗擊賊萬人前掃筆三軍中勇力駭
豺狼流文貫星虹非云尚血氣詎是工雕蟲小戎賦良
人溫然美玉同讀史撫青編芳蹤千古隆

公莫舞歌

昔人有公莫舞歌道項伯翼蔽漢王也然但言
漢王有天命未及項王不聽范增之言及增不
知幾而事項故歌以補之

剗牛割狸殪封豕羞釧實豆堆盈几錦繡筵開藏壁壘
裹甲宋盟無乃是亞父腰下玦三視項莊劍氣寒如水
公莫舞兮行且止以身為衛拂衣起增卻顧兮良色喜
隆準果是真天子怒撞玉斗亦徒爾同雲集霰已如此

蠲租樂擬樂府

勾芒布令土脈濡荷犁早向東阡趨男耕婦織閒時無
料理粟帛供正需食毛敢辭王稅乎春回部屋大澤敷
小吏旁午捱門呼竊疑督賦驚農夫却宣王命傳蠲租

傳蠲租蠲租樂新絲縲後新穀登換取金錢娛老弱

黃石授書

智勇非深沉難言天下事稍挫便拂顏斯為杯缶器留
侯不世才佐漢膺重寄當其圯上遊與衆了不異何來
一老翁粹然命納屣三進不為羞深折少年氣所授是
何書乃擅帷幄議當時林隱人踪跡畧奇秘卻令穀城
石受祀永不替

讀司馬溫公諫院題名記

豐碑聳立高尋尺銀鈎鐵畫生光澤
纍纍若若同時榮
莫混賢奸一片石天風凜烈護剛堅
表列平生勝竹帛
他年元祐鈎黨臣義形石工傳安民
豈知後世翻寶愛
幾與諫院題名隣君不見山可礪
兮河可帶桑田滄海
還相代此名一留不復敗

芝蘭曲

芝蘭者芝花如蘭非芝與蘭也見陸象山集

碧空星耀明離離下映瓊圃三華芝玉英綽約如蘭猗

幽姿特藉五雲奇
九光攢簇寶蓋垂
珊瑚玉樹紛葳蕤
畝畹之間歛蔥蒨
國香得並芝房薦
瑶草琪葩種獨擅
採上彤廷露華泣

高其佩指頭畫廬山瀑布

廬山高高挿天瀑布千尺飛
其顛擘開玉峽白龍走空濛
萬古生雲烟七十老翁戲作
此不用霜豪用十指丈山尺
樹都不論壁間彷彿流寒水

觀穫

秋聲入園林涼風動高閣偶出步郊垌斜陽照墟落
眄彼隴畝間黃雲堆漠漠錢鏹已早庠銍艾聲參錯
畦東與畦西是處竟秋穫手刈賽疾遲背負爭強弱
遺秉與滯穗寡婦亦云樂吾聞四民中惟農苦莫若
有年穀價低歉年委溝壑即今豐稔收租重主人索
益信為政者仁民最先著

擁鑪讀書歌

首山之銅出天然何人鎔冶精雕錫鏤蟠刻螭無斧鑿

天吳紫鳳紛騰騫歸然不共桑海變長弘血色生新鮮
嗟予好古忽得此寶之不啻珊瑚鞭豐隆布雲青女降
凌空裁玉落地繁飄風弗弗起天末千里萬里沉寒烟
有懷趙衰苦莫遇博山獨擁紅炭然溫懷續續吐暎氣
性根理窟資探源我有會心非獨樂常思衣被天下大
小無號寒

煖研歌

陰凝北陸寒風多燕山雪片紛相摩山積皜素池停波

翔陽隱光倏忽過指頭冰凍真無那我方臨窓事研究
空齋賞玩煩磋磨縱有翠濤端石可柰何呼童為添煖
研火更濟之水陰陽和寒熱均調融墨氣安置几上平
不頗浮光含潤露精彩佐我終日之吟哦抒長句歌煖
研君不見當時此法無人傳乃令嬪妃呵筆於便殿

臘八日

索饗大蜡伊耆始夏曰嘉平殷清祀周家蜡禮舉歲終
文武之道均張弛秦復夏名緣祈仙權輿定臘寶劉氏

蜡八相沿訛臘八八日號臘何所指當年飲粥成風俗
果靡雜和期相侈或傳此日浴佛節阿誰能辨非與是
歲在庚戌月己丑義娥丸轉窮次紀哉生明後後五日
作粥吾亦聊爾爾松榛棗栗杏胡桃黍稷梁豆堆累累
水火既濟入鼎烹聲瀉松風萬壑起便啜數椀潤詩腸
侑以新句加綺靡明窓靜賞送流年不隨獵騎平原裏
自鳴鐘

扶桑日出海門紅大秦西洋颺景風懸撞度索底貢同

於皇聲教敷天通梯航山海來朝宗厥獻奇物自鳴鐘
銅輪鐵絃凡幾重機軸循環運其中應時滴響聲春容
挈壺無所施其功精巧絕倫疑鬼工倭班流汗難追踪
異哉茲物無始終週歷晝夜春與冬懸置几上勝金鏞
晚報日昃曉嶠東我聞寶賢寶物雖不同咸賓亦足效
球共考時定律佐三農此鐘之利貽無窮

題宋宣和清明上河圖用駱賓王帝京篇韻

大禹敷水土導河過龍門
滌決萬里間卓為羣瀆尊流

經積石走函谷東過洛汭繞甸服土中自古稱洛都襟
帶山河雄地軸維昔宣和金盛時寒食初過一百六淡
烟輕雨清明天踏青歲歲侈華屋華屋朱樓金闕隈千
門萬戶天邊開飛花香滿宜春苑稱觴獻壽柏梁臺珮
響千官入山呼萬乘來簪裾艷文藻雲漢儼昭回梯航
萬里至輻輳日中市綺縠拂粉袂連袂如雲起柳陰暗
沙堤花光明御水寶蓋蔡京車高牙童貫里中樞甲第
起崇墉相國高堂列鼓鐘道君禮樂三千盛孱國山川

百二重春入上林迎旭日雲開水殿躍飛龍
樓鳳閣相輝映山城鼓吹春遊盛春遊處處多
貴臣青驄駟車鄰鄰明月樓中邀上客紫薇花
下宴嘉賓滿堂珠履珍羞錯從容款曲金蘭親
斜陽返照天欲暮汴水橋邊車馬度橋邊街市
何喧闐萬貨千商夾道路路旁桃李紛芳菲遊
人雜還白馬肥朝催玉勒花間去暮拂金鞭柳
岸歸頗厭錦繡服新裁白紵衣劇孟風未峻郭
解力猶微五陵擅游俠戚里相因依平生但言
憑義氣捨身

許友未覺非郊畿
霽霽帶晴雲稻田桑圃望中分
村墟景象多幽趣
點綴蚩蚩忘帝勲
婦子嬉無節長幼畧無文
常樂昇平烽火息霸陵閒却故將軍
柳堤遊客艤船待一棹輕移
山勢改媽紅粉白夾岸嬌
蘭橈畫舫中流在中流競渡
各紛馳渡口魚磯疊石為更有一川風景別身在蓬萊
自不知蓬萊宮殿何繁華
瑤島瓊臺入座賒仙人
爐煉長生藥羽客丹成九轉砂
靈素作安期遺我棗如瓜
驅山走海丹青變筆底烟雲紙上見神思妙

藝出清新偶然展軸驚萬人巧瞻奪天工結構含精氣
遠過顧虎頭不數陸仙尉仇子此卷何為哉燕雀嬉嬉
畫裏來驅鄰自召強鄰侮繁華侈泰禍之媒牛車俛首
受縛去冰天雪窖嗟徘徊即今歌舞地花發為誰開空
留遺跡在憑弔費詩才

題戴天瑞指畫山水圖

玻璃貯碧無涯津田田荷葉出水新草堂坐對清埃塵
忘機養得鶴性馴瀟灑更有松與筠遠峯掃黛青嶙峋

有客有客來訪頻高山流水無俗緣苔徑曲轉過柳樊
主人不用迎出門筆墨渲染古來聞指頭蘸墨見此人
吁嗟絕藝工且神一指乃能探其元無因得悟天龍禪

新蟬

今年天氣炎五月新蟬噪初聽聲尚澁漸覺羣喧鬧飲
露抱高枝臨風曳長調傍晚響愈繁先秋未免躁榆枋
恣往還決起安所好未能萬里遊且共鶯鵲笑

御製樂善堂全集定本卷十四